

Bim Coiffeur – Mani Matter

[Strophe 1]

Bim Coiffeur bin i gsässe vor em Spiegel, luege dri
und gseh dert drinn e Spiegel wo ar Wand isch vis-à-vis
und dert drin wieder spiegellet sech dr Spiegel da vor mir
und i däm Spiegel widerum dr Spiegel hinfür

[Strophe 2]

Und so geng wyter, s'isch gsi win e länge Korridor
i däm mi Chopf gwüss hundertfach vo hinden und vo vor
isch ufgreit gsi i eir Kolonne, z'hinderscht isch dr Chopf
i ha ne nümme kennt, so chli gsi win e Gufechnopf

[Strophe 3]

Mi Chopf, dä het sich dert ir Wyti, stellet öich das vor
verloren ir Unäntlechkeit vom länge Korridor
i ha mi sälber hinde gseh verschwinde, ha das gseh
am heiterhülle Vormittag und wie we nüt wär gscheh

[Strophe 4]

Vor Chlupf han i mys Muul ufgschperrt, da si im Korridor
grad hundert Müüler mit ufgange win e Männerchor
e Männerchor us mir allei, es cheibe gspässigs Gfüel
es metaphysischs Grusle het mi packt im Coiffeurgstüel

[Strophe 5]

I ha d'Serviette vo mer grisse, ungschore sofort
das Coiffeurgschäft verlah mit paar entschuldigende Wort
und we dir findet i sött e chli meh zum Coiffeur ga
de chöit dir jitz verstah warum i da e Hemmig ha